

## **Aldo vom Speck: Schnitzelbank 2 (vorgetragen an der GV des VWT)**

Irgendwie erinneret mich da Bild a 's Gallisch Dorf vo Asterix und Obelix,  
und ich wär dänn de ungemein beliebte Sängler Troubadix!  
Min Widerstand bruucht au kein Zaubertrank.  
Ich finde eifach mit Versli da Rank.

*Ganz z'usserschtusse und äinne am Rhy,  
döt liit e schös Dörfli mit sehr guetem Wy!  
Holla di holla und holladiho  
Z' Thäynge dusse do isch's halt eso!*

Scho ganzi zeh Johr tuet de VWT wache,  
über dä Lärm und anderi Sache.  
Au 's Baugsetz tuet er gnau überwache.  
Da isch meh zum Brüele, als wie zum Lache.

*Dä VWT isch zwor - siit zeh Johr scho do,  
und versuecht dä Gmeind z'zeige, wie 's au chönti goh.  
Holla di holla...isch's*

Mir sind Energiestadt und chinderfrüntlich grad au,  
dezue isch de Gmeindrat sehr gschiid und recht schlau.  
Er förderet 's Gwerb und au d' Industrie,  
nu 'd Wohnqualität - die schriibt er ganz chli.

*E ganzes Quartier mue Verchehrslärm erliide,  
üsen Gmeindrot meint: «Da isch nid 'z vermiede».  
Holla di holla...isch's*

Dafür chasch do ohni Bewilligung Schrott deponiere,  
muesch do dezue nid mol de Gmeindrot go schmiere.  
Wänn d'jommerisch: «mei Exischtenz isch bedroht!»  
Chasch alls deponiere, soviel wie nu goht.

Lueged doch selber emol wie da bim Chesslerloch usgseht!

*E Parkverbot durezsetze isch ächt er Problem,  
wa söll mä au mache? Es isch nid bequem.  
Holla di holla...do gohts halt eso*

Uf de hindere Chesslerlochstross will de Gmeindrot nämlich e Parkverbot installiere,  
dänn d'Laschtwägeler tüend dött d'Umgebige versch...miere!  
So tuet d'Polizei eifach **ei** Parkbuess kassiere  
und loht dänn dötte de Laschter (**'s ganz Wuchenend!**) gratis campiere!

*Zahlsch eimol e Buess, dänn loosch din Chlapf stoh,  
wie 's Bispiel jo zeigt, tuets eifach so goh!  
Holla di holla und holladiho... do gohts halt eso*

So würd useme Buessezettel en Parkschiil!

Wie's jetzt söll wiiter goh, weiss glaub niemer.  
Aber min Bänkelsong goht no wiiter:

Im Speck häts au Pflanzblätz, und zwor no recht viel  
Doch schiint 's Angebot grösser, wie 's agschtrebte Ziel.  
Drum goht mä de Pachtzins i d' Höchi go triibe.  
So chasch die letschte paar Mieter, grad au no vertriebe.

*Wa isch wohl es Ziel vo däm Pachtzinse Wuecher?  
Sölls döt öppe Platz ge – für Bauländli Suecher?  
Holla di holla... gohts*

Oder e wiiteri Industriezone im Wohnquartier Speck?

Es Seniorezentrum gseht wüerklich guet us.  
Mir wänd nume hoffe, au d' Leitig chöm drus.  
Bim ganze Projekt tuet nonid alls stimme,  
und niemert weiss: wer sind do die Schlimme?

*E schös Huus isch wichtig und d' Leitig halt au.  
Wenn beides mol stimmt, dänn säged mir - Whow!  
Holla di holla... isch's*

*Ganz zuschert usse und ännne am Rhy....*

Immer wieder aktuell: [wohnqualitaet-thayngen.ch](http://wohnqualitaet-thayngen.ch)